

PETOLO' IZESU' ZUHO MINI'MI MONAVE GIZE-NGIDINE' LUHUVO NITE' NABA 1

Petolo' Izesu' Evenele Zuho Naba Vanu Luhuvo
Nite' Gize-ngidingumu' Gomu' Gataa' Gamazi

Mene luhuvo nite' nene aposolo' Petolo' gizine' ve. Petolo' aza Betesaida ebekuti' ve minine'. A'mine ebe' Betesaida nene Zuda veliti misubo lingela nGalilaia polovinisi ve langu' minine'. Ido' Izesu' aza olihe gulive gosoho' Keha' ve lo molo-damivo Petolo' gulive nene Simoni' ve lo minine'. A'mine Izesu' molo-dine' gulive Keha' nene do velepe' izo nGiliki aleveti gamazi'ningutu' lolone' nene Petolo' ve lo mineleseive. A'mine Petolo' gulive ne'mi monovo nene ne'mino neive: Ele'vole' ogo minaa' neine' init'e geheni ne'mine ve. Melehi gulive nene Zohane' ve. Petolokisi akunolo Adeleakisi ingine alaha' daa' asive minasine' ve. A'mine alaha' dii maketi milaa' gonou' maka' daa' ave ma minasine' nene uvolohoi akunoloi ado' Zakoboki Zohaneki ve. Ido' alaha' daa' ani' nene nGalilaia noso ohuno nabauti' disa maketi milaa' ani' ve. A'mine ve seta've seta've ingine noso holo-ngedaa' ive Zohane' izipahala lili' igi mini neloti' alinge' nene Izesu' izipahala zuho lili' ani' ve. Alinge' nene Petolo' aza Izesu' izipahala zuho muki' minanguti' aposolo' gono di hize ele' i-dilizave lo ve tuvelu'a do kegese-ngidiveuti' minine' ve. Ido' a'mine Izesu' aposolo've tuvelu'a minangu' nene Petolo' aza ve naba ne'mine minine' ve. Ido'

aza gamazi lo ogo molo ine' inite' vaikumu' nene Mataio' ve Maleko' ve Luka' ve Zohane' ve gizani' buku seta' ve seta' veukisi ido' aposolo' bukuukisi nene gatelesane. Pedekosi gameneu' O'moso'mi Sikalahu' ne'mo Izesu' izipahala zuhola lemo minine' gameneu' evene' vai' igi di gese' ave mono' lo-ngimive nene Petolo' ve. A'mine di gese' aveu' nene kanitili ato ato' mukikuti' ani' Zuda ve masi vai' minani'. A'mine gameneu' Izesu'nimu' gili ele'vole' igi eze evenele zuho lili' ave tili tauseni minangu' nene a'mine kanitili ato atokuti' ani' Zuda ve lingesi ne'mine ani' noloseive. Ido' Zuda ve minamave nene gana' api' ogo Izesu' gamazi've lamine' lo-ngemelive lo O'moso'mo Petolo'ni ele'mize molani' ve. Ne'mine gamazimu' nene Aposolo' tenisi ido' leveniukisi ne neive. Ido' gozopo' aka'milati' li'mi ani' gamazi ma ti' lo lo neine' ma neive. Petolo' aza Kollidi ebeta vo a'mida alevesi mono' gamazi longimine'. Ne neiha Zuda ve minamave nene Izesu' gamazi've lamine' lo-ngeme'mo mone-live lo O'moso'mo ele'mize molave nene Paulo' minine' ve. Petolo' aza mono' gono vauve elo dani' nene Zuda vetingu' ve. Petolo' aza vani molo mino Loma ebekuko vo neivo a'mida Loma vete Paulo'ni bili hilani' gamenela nene Petolo'nisi lohoto' zalo' bili hilani' ve li li'mi ani'. Ido' bili hililisa navo Petolo' aza Guvelesi ve Izesu'ni bili hiladi'mine gehepeve igi nenikisi nibili hililizado' lisihe' amuve lo gelo amilite godo'ne huli gala'muda igi gize'ne di veleta igi lohoto' zalo' nilidunu' nibililizave lo lo-ngedavo gili di ne'mine i-dani' ve laa' ani'. Ido' luhuovo nite' mene gizavo gamene ha'na ogo vamivo

bili hilani' noloseive. Luhuovo nite' lumola nene Babelonia meu' minine' alu ne'mo mese' asekano nolo-lingidive lo gizine'. Ido' mono' monovo gili lamine' iga' ave linge muki' nete ti' li laa' nave: Petolo' aza a'mine alumu' gizine' nene ei' minine' ebeku' Izesu' evenele zuho muliselo' lo molo gizine' ve. Ido' Babelonia ebekumu' line' nene gepe' gamazi Loma ebekumu' lo molo line' noloseive li laa' nave.

Ido' a'mine luhuovo nite' gizine' nene Izesu' evenele zuho Podo polovinisiukisi Galatia polovinisiukisi Kapadokia polovinisiukisi Asia polovinisiukisi ido' Bitinia polovinisiukisi mini'mi monangumu' gizine'. A'mine polovinisi muki' nene kanitili ma idise Teki (Turkey) ve laa' nouningu' minani' ve. Ido' luhuovo nite' gizingumu' nene nemu' gizuve lo gizamine'za a'mingu' gizine' gamaziloti' nene ti' lo gele none: A'mine luhuovo nite' gize-ngidive nene evene' malite goboni nimili-ngidave nete gohi amuzo mili goboni mili-ngidilisa nave lo gele mino monoku' mini gili' li minilizangumu' do amuzo molo-ngedelesa gizine' noloseive lo gele none. Ne'mine lo gelo laza Loma veti gizebo ve'ine naba gulive Nelo' aza ngamani gono' daa' avesi ido' ami pilisi ve'vesi lo-ngedavo ingine api' igi Izesu' evenele zuho numudo' namado' mini'mi monani' nene goboni mili-ngidi minani' gamene nene olihe aloha neivo nehe ido' mo ogavo nehe ne'mine gameneu' nene luhuovo nite' mene gizine' noloseive lo gele none. Ido' a'mine luhuovo nite' gizingu' nene Petolo' aza Izesu' evenele mene ti' lo lo-ngimine': Inginge

mulumo geni gihi nizani'za nesi nene ngolize
 izi minilizado' o neive. Ido' ne'mino ngolize
 izilizado' o neine' nene O'moso'mo no'noho' ize-
 ledo Okulumokuko inite' lamine' goloso salani
 molo-lede neingumu' nene ngolize izilizado' o
 neine' ve. Izesu' Kilisito'nimu' gili ele'vole' ani'
 nene do ningelesamu' a'mine mulumo geni nene
 gihilizave lo O'moso'mo gele ngimine' ve. Ido' gili
 ele'vole' ani' nenako ne'mo lukovo nukevo Izesu'
 gohi tine' molo aline' gameneu' nene O'moso'mo
 gulive'ine do hozi loloseive. Monovo goloso'mi
 akalo' minadoti' huli monovo lamineli'mi akalo'
 minilizave lo Kilisito' aza helo vanise've dizo
 minine' lekine' nemu' gili minilizave lo lo-
 ngimine'. Mo O'moso'mi izipahala gehepeve
 lili' ikeni' nenako nemu' ingine gono'ine nene
 ei' gulive di oti evene' li-ngimilizave. Izesu'
 evenele minamaye nete Izesu' evenele zuho nene
 evene' goloso nizave laa' na ha Izesu' evenele
 zuho ingine igi mili minilizani' monovo nene
 a'mine Izesu' evenele minamani' aleve nete
 engikumu' nene monovo laminekovo' daa' nave
 lilizado' di mili igi mili minilizave. Nemu' ingine
 gizebo ve'inelite gamazi'ine nene gili dalizave.
 Gizebo ve'inelite gonou' ve monovo lamine'
 i ngimamaa' nave nemukisi noluve. Monovo
 lamine' ilizangu' mulumo geniu' vilizani'
 nene O'moso'mo no'noho' ize-ngegedelesive.
 Nemu' nene Kilisito' gomu' molo ngemo okine'
 monovolo' nene e'meti ilizave line'. Di goloso
 gehepeve i-dangu' nesi Izesu' aza a'mida do
 velepe' izo gamazi lo ido' do goloso o-ngedamaa'
 ine!. Ne'mine lo Izesu' evenele zuho nene
 ele'ninge va'ninge minani' nete engi' minevo'

alevo'ningu' monovo igi mili minilizangumu' lo-ngimine'. Gohi ti' lo lo ga'ine ine': Lingine lu'ine mili hamo' igi ge luka neme ne lu'ne geme ido' ge hongu monovo o neme ne hongu monovo o geme li minilizave. Monovo goloso i-ngidaa' nave nene lu'ine ngimilizave. Monovo lamine' ilizangumu' evene' nete ma di goloso i-lingidamilizani'za ma ne'mine ilizani' nene O'moso'mi no'noho' dalizaze. Nemu' lingine lengehelele izamivo minilo. Lingine gili ele'vole' igi minaa' nani' nite' nene nanitekumu' gili ele'vole' iga' nave li longo' i-lingidilizave nene lutine laminetoti' lingimilizangumu' di va'va' igivo' minilo line'. Ido' gohi amuzo molo ti' lo lo-ngimine': Evenelite mulumo geni lingimilizani' nene monovo goloso angumu' minamilive. Kilisito' mulumo geni nogeho gala gelaa' ine' ne'mini gililizave. Ne'mine ikevo mulumo geni gihilizani' ne'mo lihime monovolot'i do olovo' ongede minelive line'. Ido' gohi ti' lo ga'ine dani': Inite' muki' osu' lilin'e gamene nene mo avito' ogaze. Nemu' O'mosola lii ge hize ele' o-nede ne hize ele' o gede lii ido' O'moso'mo dalizave lo amuzo lengeme neine' gono nene dalo line'. Asi've nene mono' muliselo' gizebo ve minine' nenako nemu' mono' muliselo' gizebo ve ingine gono'ine nene di guni dalizave lo lo-ngidine'. Ingine mukito' oko'ine di'mi limi minilizave lo lo-ngimine'. Mini'mi limi ve mali'mi gonou' ve ne'mini minaato' mini mili minilizave. Mini'mi limi minikevo O'moso'mo geni'ine hize ele' ongedelido' mini mili minilizave. O'moso aza engikumu' gelaa' neine' nenako nemu' hize ele'

o-ngedeleteive.

Neloti' gohi ma ti' lo lo-ngimine': Sataniaza do'mo leme-lengedelesa nomonize. Nemugizebo igi minilo lo ga'ine dani!. Ido' Izesu'evenele zuho numudo' namado' minani' nesi ingine a'mine hamo' geni nidani'za gamene ha'na minamunivo O'moso aza inite' do lisihe' o-lengedelesa aloseive line!.

Siluvano' ado' Aposolo' bukuu' Silasi' ve laa'ave aza a'mine luhuvo nite' gizuvongu' nene hize ele' o-nidive lo lo-ngemo ido' O'moso'mo do kegese-mikine' alu Babelonia ebeku' minine' ne'mo mese' aseka lo-ngidine' nene lo-ngemo ido' Maleko' mese' aseka lo-ngidine' nesi longimine!. (Mono' monovo gilaa' ave nete gilani' nene a'mine Babelonia ebeku' minine' alu ve line' nene Izesu' evenele zuho mulise Loma ebeku' minani' nemu' lo noloseive li gilani' ve.) Ne'mine lo luhuvo nite've nene no'noho' gamazitunu' gize osu' line!.

*Petolo' Luhuvo Nite' Gizelesa Api' Ogo Gizaa'
Gamazi Gizingu' No'noho' Gamazi Gize-ngidine'
Gamazi*

¹⁻² Izesu' Kilisito' aposolo minuve Petolo'naza lingine Izesu' Kilisito' gamazi've gili diivo' minilizangumu' ve losa ido' vanise've ne'mo noso ize-lengedo Kilisito' gelekele've lengele'mize molalingumu' ve losa ei' O'moso'mi Sikalahu've ne'mo nene do kekeize lo-lengedelive lo O'moso'mo gomukuti' vomine gele minido' e'meto do kegese-lengede neine'aleve lingine venenga ve ne'mine gili mini gamene li'nbemukovo' Podo misuboukisi

Galatia misuboukisi Kapadokia misuboukisi Asia misuboukisi ido¹ Bitinia misuboukisi mini¹mi monave lengi¹ nene luhuvo nite¹ mene nogize-lingiduve. O'mosolati¹ nasahili¹ nesi ido¹ hongu lo lamino minaa¹ monovo nesi nene lengita mine vai¹ lo¹mo vo miniliho.

*O'moso'mo Leli! Mulumote Gelo Do Lu' Izo
Minevo'Alevo'Lamine'Nene Okulumokuko Salani
Molo-lede Neine'Nenako Nemu'Nene Lingine Idise
Mulumo Geni Ato Atoli'mine Gihi Nizangukisi Lon-
golize Naba Izi Minilizave Lo Petolo' Lo-ngimine'
Gamazi*

³ Ido¹ Guvetesi ve Izusu Kilisito¹ ei¹ O'moso¹ve mino ei¹ meleho minive nene opo¹ni lolone. Opo¹ni lolone¹ nene ado¹ O'moso¹mo mulumote naba gelosa lemeni dameni nene do gosoho¹ o-ledo gohi do soto¹ o-ledave. Ido¹ ne¹mine o-lidine¹ nene laza minevo¹ alevo¹ lamine¹ daloningumu¹ upuho¹ ogo gilingili ogo mino a'minem¹ gele mu¹musi¹ ogo none¹ akalo¹ nene lele'mize nomolosa lemeni dameni nene do gosoho¹ o-ledo gohi do soto¹ o-lidine¹ ve. Ido¹ ne¹mine o-lidine¹ nene Izusu Kilisito¹ hilinguti¹ do ote-didi¹mo nene ne¹mine o-lidine¹ ve.

⁴ Ee, ido¹ ne¹mine ine¹ nene aza Okulumokuko salani molo-lengede neine¹ inite¹ ado¹ geleso osu¹ lamaa¹ ido¹ goloso¹vesi minamaa¹ ido¹ emeni dameni¹ve gopo amo gosoho¹ laminekovo¹ minaa¹ inite¹ nene dalizangumu¹ ve losa lengemeni dameni do gosoho¹ o-lengedo gohi do soto¹ o-lengedave.

⁵ Ido¹ lingine a'mine salani molo neine¹ inite¹ dalizave noluvoni¹ nene lingine ezemu¹ gili

ele'vole' igi minaa' nani' nemu' nene O'moso'mo do lungu' izelingumu' ve losa ei' amuzo've ne'mo alete molo-lengede minaa' neingumu' nene noluve. Aza do lungu' izelesa do nene ogo neine' nene gamene nabala do soto' ogo mudise do lungu' izeleseive.

⁶ Nemu' nene lingine longolize izilizado' o neive. Ee, O'moso'mo gelavo idise nene gamene li'nibemu' mulumo geni ato ato' ma gihu nilizangukisi nene longolizevo' izi minilizado' o neive.

⁷ Ido' a'mine mulumo geni gihaa' ilizani' nene nanitekumu' ve. Lingine O'mosomu' gili ele'vole' igi minaa' nani' nene aza mo gihile lamine' nehe lo ne'mi monovo do soto' o-lengedelesa nene lengemengu' nomolave. Ido' evenelite gilavo ngoli ne'mo inite' mata' muki' ngivile' ogo inite' lamine' neiha ngoli nene ngoli lamine' nolihe li ningilisa oluku' gizikevo lo'votamo ha minaa' neiha alinge' ngoli nesi nene vo osu' loloseive. Lingine O'mosomu' gili ele'vole' igi minaa' nantine nene gihile lamine' noline' nene mo ngoli nene ivile' goloso ivosa inite' naba neive. Nemu' nene ne'mino O'moso'mo lengemengu' molaa' ilidot'i gele ele'vole' ogatine gihile lamine' neine' nene soto' ogavo Izesu Kilisito' gohi soto' o leme-line' gamenela nene aza longopo'ni lo gulivetime do hozi lo do naba o-lengedelingumu' nene a'mine mulumo geni ato ato' nene gihaa' ilisave.

⁸ Izesu Kilisito'ni nene lingine mo ma ningamani'za lutine imi minikeve. Ido' idisesi mene oko'nolo' ma ningami nizangukisi nene ezemu' gili ele'vole' i mini lutingu' gulumo avile lisivo longolize izi minani' nene laza evenelitesi ngelo

monovo ma lamolonido' o minine' longolize
ado' Okulumokuti' atoli'mine ogo minine' ma ne
neive.

⁹ Ido' ne'mine igi longolize izi nizani' nene
Kilisito'nimu' gili ele'vole' igi minani' ne'mi gi-
hile've nene O'moso'mo lutine lukuvo emelido'
mini mili nizani' nemu' nene lutingu' gulumo
avile lisivosa longolize izi nizave.

¹⁰ O'moso'mo leli' lehize-ledelesa gele minine'
nasahilikumu' li soto' ika' ika' iga' ave gozopo'
minani' polohete nete nene a'mine a'me luvoni'
gamazi ado' O'moso'mo lukuvo lemeline' nene
nado lemeline li ne'mi monovomu' nene gele lone
li vise' ika' ika' i'mi vi minani' ve.

¹¹ Ee, Kilisito' Sikalahu've ne'mo a'mine polo-
hete engiku' omo mino Kilisito' mulumo geni ato
ato' gehelingumukisi lo soto' ogo ido' ne'mine
ilidoti' Guvelesi ve naba gehepeve lolo' ogo
mineline' makilo' mine do dizelingumukisi lo
soto' ine' nene a'mine polohete nete a'mine mu-
lumo geni geheline zaho nolive li ido' a'mine
Sikalahuli'mo lo soto' ogo lo-limine' inite' nene
nani gamenelo' soto' ilizave li ne'mi monovo
nene vise' ika' ika' iga' ani' ve.

¹² Vise' ikevo O'moso'mo ti' lo ngelebzine'
ve: Inginge Kilisito' geheline' initekumu' li soto'
igi gono dani' nene angise'inemu' dami asi
lengikumu' dani' nene O'moso'mo ngelebzavo
gilani' ve. Ido' a'mine Kilisito'nimu' lani' gamazi
nene idise lingine mo gilikeve. O'moso'mo
Sikalahu' Okulumokuti' lelita imiseline' ne'mo
do ote-ngedavo Kilisito'nimu' gamazi lamine' li
soto' igi li-lingimave nete nene mo li soto' igi li-

lingimikevo gilikeve. Ido' a'mine li-lingimani' gamazi laminekumu' nene angelo' netesi nene ma ningō geleloinakoo li gili minaa' nave.

Monovo Golosolo' Minevo' Alevo' Igi Minangutti' Nene Kilisito' Vaniseli'mo Do Kuluhize-lingidingumu' Gili Mini O'moso Monovo Laminekovo' Ogo Minaa' Neine' Ne'mine Igi Lingine Monovo Laminekovo' Igi Minilo Lo Petolo' Ga'ine Dani' Gamazi

¹³ Ne'mine o neine' nenako nemu' nene lutine gatine nene gono dalido' di nene i-di mini lingine negi hizami monovotido' ha gizebo lamine' igi mini Izesu Kilisito' soto' o lemelido' nasahili' gohi o-ledelingumu' nene mudise gili mu'musi' i minisa minilo.

¹⁴ Lingine O'moso'mi izipahala mini ei' gamazi've gili dalizado' o neine' nenaze. Nem'u' nene lingine gomu' ezemu' gilami haza minani' gamenela vomine lanite' gilaa' ani' inite' malo' nene gohi mini milamilo.

¹⁵⁻¹⁶ Asi mono' godolou' nene O'moso'mo line' gamazi ti' li gizi nizani' ve:

Naza nene monovo'ne golososi nomine' nouvoni' nenako nemu' nene linginesi monovotine golososi nomine' minilo.

Ido' ne'mine line' gizi nizani' nenako nemu' nene elese molo-lengedo do eita ive O'moso aza monovo goloso'vesi nomivo neine' ne'mine igi linginesi nene inite' mata' muki' igi mili ilizangu' nene monovotine golososi nomine' minilo.

¹⁷ Ido' lingine meteho ve li O'mosola laa' nani'za evene' muki' ize' molo-leddaa' iline' nene gopo evene' mala ningē lamine' o-ledoo

mala ninge goloso o-lede minosa nene ize'
 molo-ledeline' nevoba asi leli' hamo hamo'
 nene ogo molo olonido' olonido' do molo meni
 lamine' lemelihe goloso lemelihe iline' nene mo
 a'mine o nolone' inite' lisihe' o nolidokovo'
 nene lisihe' ogo golo hizo lemeleseive. Ne'mine
 iline' nenako lingine olihe goto' numudine Oku-
 lumokuko vi minami venenga ve gili me misub-
 ouko minilizani' gameneu' nene ezemu' lenge-
 helele izivosa mini monovo lisihe' laminekovo'
 igi mili minilo.

¹⁸ Ido' ne'mine igi minilizani' nene lingine ti'
 li gili nizani' nemu' nene ne'mine igi minilisave.
 Lingine lengi' avotingidati' di minani' dingani
 monovo igi mili minanguti' nene do eita ogo meni
 hize-lingidine' nene me misubou' inite' hulupo
 eleline' siluva' nehe ngolimoni nehe nevo'mine
 inite' nedunu' nene meni hizine' nevoba

¹⁹ asi mo Kilisito' vanise've lamine' nedunu'
 meni hizine' ve. Ee, Kilisito' aza lihimetemu'
 belaa' noune' sipisipi angale oko'nolo' inite'
 goloso hamokisi nomine' ne'mine lolo' ogo neivo
 biladoti' vanise've lamine' nedunu' nene meni
 hizine' ma neive.

²⁰ Ee, O'moso'mo me misubo nene olihe do
 soto' amosa gozopo' vomiloti' nene ne'mine
 ilingumu' ha mo ningo gele minine'za ha minosa
 alinge' gameneu' mene lengikumu' ve losa do
 soto' o-dine' ve.

²¹ Ne'mine o-davo a'mine Kilisito' gono dadoti'
 nene lingine Kilisito' hilinguti' do ote-do do naba
 o-dive O'mosomu' nene gili ele'vole' ani' nene
 O'mosomu' neve nene gili ele'vole' igi ezemu' gili
 mu'musi' igi minaa' nave.

²² Lingine gamazi gihile di minadi¹mo lutingu¹ monovo goloso minine¹ nene di huli lutine di guluvi¹ lisa lingine lengi¹ zuho Kilisito¹ evenele lutine ngimilizani¹ nene abeleni ami asi lutine ngimi gili¹ lilizado¹ nene lisihe¹ i nizaze. Mo lutine laminetoti¹ nene amuzo mili lutine ge neme ne gome li minilo.

²³ Lingine nene lengemeni dameni gosoho¹ ogavo gohi soto¹ ani¹ ve. Ido¹ gohi soto¹ ani¹ nene helosa osu¹ liliive¹mo zuho molavosa nevoba asi helosa osu¹ lamaa¹ neive¹mo zuho molavosa gohi soto¹ ani¹ ma neive. Ee, minevo¹ minevo¹ ogo mino minevo¹ minevo¹ ogali¹mi monovo do soto¹ o-ledaa¹ neine¹ inite¹ O'moso¹mi gamazi ne¹mo lengi¹ lutingu¹ gono dadoti¹ nene lengemeni dameni do gosoho¹ ogavo gohi soto¹ ani¹ ma neive.

²⁴ Ido¹ mene noluvoni¹ gamazi nene mono¹ godolou¹ ti¹ li gizi nizani¹ gamazilo¹ vo milise¹ o neivosa nene noluve:

Evene¹ muki¹ leli¹ nene guvise navise ne¹mine nene none.

Ido¹ leli¹ do soto¹ oga¹ noun¹ inite¹ lamine¹ tamine¹ ato ato¹ muki¹ nene ha a¹mine guvise navisel¹mi guvovo ne¹mine nene neive.

Guvise nene ga¹nuvo elo osu¹ lavosa guvovo¹ve nene suludo¹mozaa¹ neive.

²⁵ Ne¹mine oga¹ neiha Guvelesi ve¹mi gamazi nene mo ele¹vole¹ ogo minevo¹ minevo¹ ogovo¹ mineleseive. Ido¹ a¹mine Guvelesi ve¹mi gamazi nene ado¹ a¹mine li soto¹ igi li-lingimani¹ gamazi lamine¹ nene neive.

2

*Lingine Monovo Goloso Hulisa O'moso'mi
 Gamazi'mo Amine Lingimivo Ido' Guvelesi Ve
 Nene O'moso'mi Numuno Do Amuzo Molo Minaa'
 Neine' Geheni Ne'mine Neivo Ido' Lengi' Nene
 A'mine Numuno'mi Geheni Lingela Ne'mine Mini
 Ei' Evenele Gihile Gehepeve Minilo Lo Petolo' Lo-
 ngimine' Gamazi*

¹ Nemul nene lingine goloso monovo ato ato' muki' ado' evene' go'ine izaa' ido' lutingu' monovo goloso haleko neivosa evene' lamine' gili monaa' ido' evene' maliti initekumu' lavodine lemavo muludingu' goloso gilaa' ido' gamazi di goloso igi laa' monovo ato ato' muki' nesi nene ogalone li mudise huli osu' lisa mini

² O'moso'mi gamazi ne'mo lute do naba ogavo lukuvo naloningumu' ve li izipe namunolite aminemu' ngisavo iga' nani' ne'mine igi lingine a'mine lutine'mi noso' nite' aminemu' nene lingisivosavo' minilo.

³ Ne'mine igi minilizave lo noluvoni' nene lingine Guvelesi ve'mo mulumote ningoo do lamine' o-ledaa' neine' monovo've'mi lanite've ningi nigilani' nemu' nene noluve.

⁴ A'mine Guvelesi ve nene numuno gizaa' geheni sikalahu'vesi minine' ne'mine ne neive. Evene' nete ei' nene di ningisa goloso neive li di hulani'za O'moso'mo eikumu' gilivo dizo neivosa do kegese-dine' nenaze. Eita nene igi gi'mizi minilo.

⁵ Ne'mine igisa lingine nene numuno gizaa' geheni sikalahu'vesi minine' ne'mine lili' igi minikevo O'moso'mo ei' Sikalahu've'mi numu've

lolo' o-lengedelize. Guvelesi vela igi gi'mizilo. Ido' ne'mine igisa lingine O'moso'mi numungu' gono di-dilisa kekeize li minani' zuho lili' igi mono' numuno nabau' O'moso inite' lehizi-daa' ani' ne'mine igi O'moso'mo Izesu Kilisito' gono dangumu' gelosa ninge lamine' daline' inite' nene lengi' lutinguti' nene di soto' igi lehizi-dilizave.

⁶ Mene noluvoni' nene mo lamineto' mono' godolou' O'moso'mo line' gamazi ti' li gizi nizado' nene e'meto noluve:

Lingine gili'nalo.

Naza numuno gizaa' geheni mamu' nene giluvo dize neivosa

a'mine geheni nene numuno do amuzo molaa' geheni minelive losa

do kegeso nen'i evene'ne zuhoti ebe'nine Zaioni golo neu'

ado' engi' vovo'ningu' gehepeve nene nohulo-duve.

Ido' ezemu' gili ele'vole' ilizave muki' nene gili ele'vole' ilizani' ne'mi gihile nene soto' amivo ngovozo ma hilamilisave.

⁷ Ido' a'mine geheni nene mo dizo neive noluvoni' nene lingine ezemu' gili ele'vole' i nizave nene ezemu' gilavo dize neivosa nene noluha evene' ma ezemu' gili ele'vole' amavela nene mono' godolou' ti' li gizi nizani' gamazi malo' nene mo gihile izave:

Numuno gizilizani' geheni mukikuti' nene geheni ma

numuno gizaa' avelite ningisa goloso o vive li di hulani' geheni ne'mo

geheni muki' ngivile' ogo numuno do amuzo
molaa' geheni lolo' ogave.

⁸ Ido' ma nene:

A'mine geheni nene evene' lodoho' izi limi pou'
li

ingalizani' geheni gehepeve ne neive.

Inginge lodoho' izi limi ingaa' nani' nene
O'moso'mi gamazi gili damadi'mo nene limi
ingaa' nave. O'moso'mo ingine mo ne'mine
ilizave lo gele neido' nene ne'mine iga' nave.

⁹ Ne neiha lingine neve nene mo O'moso'mo
ei' ve lo do kegesine' zuho mini Guvelesi ve
naba'mi mono' gono di-di inite' lehizi-daa' aveliti
muliseuti' mini O'moso'mo ei' ve lo do kekeize lo-
lengede neine' zuho nene nizave. Ido' ne'mine
nizani' nene vode vavo lehelele izeline' la-
bana'veu' nene liti'musouti' elese molo-lengedo
lengele'mize molavemu' nene opo'ni li guvele li
soto soto' ilizangumu' nene ne'mine aleve nene
nizave.

¹⁰ Gomu' lingine evene' numuno gulivetine
minamivo gopo minani'za idise nene numuno
gulivetine O'moso'mi evenele zuho ve lisa nene
nizave. Gomu' nene O'moso'mo isete izo
nasahili' o-ledaa' ine' monovo've nene lengita
hetelamivo minani'za idise nene mo lengita ogo
hetelavo a'mine'mi lulou' nene nizave.

*Lingine Nene O'moso'mi Gelekele' Ve've Minii
Monovo Lisihe' Laminekovo' Igi Mili Minikevo
O'mosomu' Gilamave Nete A'mine Monovotine
Lamine' Nene Ningisa O'moso Opo'ni Lilizado'
Mini Mili Minilo Lo Lo-ngimine' Gamazi*

11 Lingine lu'ne lengeme nouvoni' alevekizo, me misubou' aleve minami gamene li'nibemukovo' a'mida mene minilizani' nenako okodine'mo me misubou' initekumu' lanite' giline' nene gili hulilo. Okodine'mo ne'minemu' giline' ne'mo lutine nene ivile' olosa lovo o emaa' neinaze. Lingine gili hulilo lo nolo-lingiduve.

12 O'moso'mi evenele minamaveti zuhoti vovo'ningu' minilizangu' lingine igi mili ilizani' nene mo monovo lisihe' laminekovo' nene igi mili minilo. Ee, ingine lengikumu' evene' goloso ve li divi ledivi' i-lingidi laa' na ha ne'mine i-lingidi minilizangukisi monovo lamine' igi mili iga' ilizani' nene ningi mini' mini' ilizadi'mo O'moso'mo monovo'nido' ogo do ningeline' gamenelo' ingine nene a'mine monovote laminekumu' O'moso opo'ni' lilizangumu' ve li monovo lisihe' laminekovo' igi mili minilo.

13 Guvelesi ve'mo ningivo lamine' ilingumu' ve li lingine evenelite amuzo ato ato' ngimani' aleve muki' nene gelekele' i-ngidivo' minilo. Ado' evene' linge muki' ngivile' ogo minive guvelesi ve naba gehepeve nolihe

14 ido' a'mine guvelesi ve naba ne'mo ingine evene' monovo goloso ilizave lihime ngemaa' gonosi ido' monovo lamine' ilizave ngopo'ni laa' gono nesi nene dalizave lo ngele'mize molave ngamani naba nilizahe muki' nene gelekele' i-ngidivo' minilo.

15 Ido' lingine gelekele' i-ngidivo' minilizave noluvoni' nene O'moso'mo ti' lo gele neingumu' nene noluve: Ado' lingine monovo lisihe' lamineto' e'meti minilizadi'mo evene' negi ado'

gamazi monovo gilamavete divi ledivi¹ i-lingidaa¹
nave neti ve'nido¹ nene humo izi-ngidikevo gohi
lamilisave lo gele neive.

¹⁶ Lingine Mose¹ louli¹mi gesi mingu¹ mini
nalato¹ ve gili minangut¹ kuluhizi nizani¹za
a'mine louli¹mo adelo¹ damivo fili o none¹ ne-
nak¹ nemu¹ nene monovo ato ato¹ muki¹ nene
lihime¹ve nomivo gopo ha olosune lisa monovo
goloso dikelizave. Ne'mine amilo. Asi O'moso¹mi
gelekele¹ ve mini ei¹ lulolokovo¹ igi mili minilo.

¹⁷ Ado¹ evene¹ mukikumu¹ gilavo dizivo mini
Kilisito¹ evenele leli¹ zuho muki¹ nene lutine
ngimi mini O'mosomu¹ golise gili mini a'mine me
misubou¹ guvetinesi ve naba minive nene di naba
i-di gili imi minilo.

*Gonou' Aleve Nene Gelekele' Igi Gono Lamine'
Di Minilizangu' Hazalo' Mulumo Gono Ma nGim-
ilizani' Nene Kilisito' Engikumu' Mulumo Gono
Ha Gihine' Monovo'velo' Nene E'meti A'mine Mu-
lumo Gono Nene Ha Gihilizangumu' Lo-ngimine'
Gamazi*

¹⁸ Gonolo¹ gipe alu lingine lengehelele gehep-
eve izivo mini metinge gizebo vetine nene
gelekele¹ i-ngidivo¹ minilo. Ado¹ gizebo vetine
ve lamine¹ hongu ve ne'mine minilizanikovo¹
gelekele¹ i-ngidi minilizavoba asi metinge gasava
ve minilizani¹ nesi nene ha gelekele¹ i-ngidivo¹
minilo.

¹⁹ Ee, evene¹ ma inite¹ ma do goloso amilido¹
hazamu¹ mulumo gono imikevosa aza hongu lo
mino a'mine mulumo nene O'mosomu¹ gele mino
ha geheline¹ nene O'moso¹mo ezemu¹ gelavo
lamine¹ oloseive.

²⁰ Ne neiha lingine inite' ma di goloso ikevo a'minemu' lihime lingimi gavoso nilingibilavo lingine hongu li mini ha gihilizani' nemu' nene longopo'ni lilizado' minilizahe. O'ove. Longopo'ni lamilisani'za lingine inite' lisihe' lamine' ma ikevo gavoso nilingibilavo lingine hongu li ha gihilizani' nemu' O'moso'mo ningivo lamine' oloseive.

²¹ Ido' ne'mine ilizave lo noluvoni' nene O'moso'mo ne'mine ilizave lo elese molo lengele'mize molani' nenako nemu' noluve. Ido' O'moso'mo ne'mine ine' nene Kilisito' azasi lingine nenil' ogo molo uvodo' api' napi' igi mili minilizave lo avazaha pikisa ne'mine bele molo lengito' medelo mulumo gono gihine' nenako nemu' nene O'moso'mo linginesi ne'mine ilizave losa elese molo-lengedave.

²² A'mine ogo molo minido' api' napi' igi e'metilizave Kilisito'
aza nene lihime ma damine' ma neive.

Ido' go'ine izo soza gamazi veleuti' vivo evene'
hamoli'mosi ma gelamine' ve.

²³ Evenelite divi ledivi' igi elemado' nene do velepe' izo aza a'mido' do goloso o-ngedo ngelemesa'mine' ve. Ido' mulumo nite' i-dado' nene golo hizo golise gililiza gamazi lo-ngedamo asi goni' do lisihe' ogovo' gelaa' ive O'moso'mi anaukovo' molosa ezelo' lehete o minaa' ine' ve.

²⁴ Ido' leli' nene lihime mudise hulisa monovo lisihe' laminekovo' igi mili minivi' alivi' ilizangumu' ve losa asi've nene leli' lihimete ei' oko'nolo' geho a'minemu' nene lohoto' zalo' hilin'e' ve. Ei' biladi'mo lingine nene mo lamine' ikeve.

25 Ido' naza ne'mine noluvoni' nene lingine sipsipi ize ne'mine mini vi gopo igi minani'za idise mini velepe' izi lengi' lutine'mi noso nite'eme'mo vo a'mido' gizebo o-lengedelivela igi gi'mizikeni' nizani' nenako nemu' nene noluve.

3

*Ele'ninge Va'ninge Lamin Minilizani'
Monovomu' Petolo' Lo-ngimine' Gamazi*

1-2 Ido' gomu' noluvoni' ne'mine igi vene' nete vadingine gelekele' i-ngidivo' minilo. Ee, ne'mine ikevo vadinge engikuti' linge ma Kilisito' gamazilo' gili dami nilizani' nene vene'ine lingine ha lenghehelele izivo mini monovo goloso lengita nomivo monovo laminekovo' igi mili nizavo ingine a'mido' ningi mini' mini' ilizani' ne'mo nene lingine gamazi li-ngimamavosi Kilisito'nimu' gili ele'vole' igi eze zuhouko ha di imine' mili minilizahe. Nemu' lengi' nene ha gelekele' i-ngidivo' minilo.

3 Ido' gonolisetine nene okodine losuvolo' mineline' inite' ado' madudine zopovo nalava izi di ma'mine ma'mine iga' nehe, ngolidunu' lili' ani' inite' nehe, okodido' inite' lamine' tamine' nehe, nevo'mine inite' neve nene minelivoba

4 asi lengemeni dameni lutinguko haleko minaa' neine' ado' hongu lo alaha' ogo minaa' lengemeni dameni ne'mo nene litehe elo osu' lamo gonolisetine gihile mineleseive.

5 Ee, ido' gomu' vomila O'mosola gi'mizi mini ezelo' gili mu'musi' igi minaa' ani' vene' nete nene lute'mi gonolise've minelive li a'mine

ne'mine monovolo' e'metisa va'ningida gelekele'
i-ngidi minani' nenako lengitasi ne'mine
monovotine mineline' nene lamine' oloseive.

⁶ Mene noluvoni' nene ado' Sala' aza Abala-hamu'nimu' nenito' gizebo ve ve lo gamazi've
gele do'mo vo minaa' ine' ma'minemu' nene
noluve. Ido' lingine monovo laminetokovo'
e'meti mini ne'mine mana'mine initekumu'
golise gilami minilizani' nene ei' aluvo gidini
mini ei' gili vani' minilisave.

⁷ Ido' va'ninge lingine eledinginemu'
luvodi'mine ogo ti' lo nolo-lingimuve: Lingine
nene O'mosola laa' alone' akate nene goloso
ogalive li eledinginemu' nene ingine amuzo
damani' mini lelitoti' nene limisa nizave li
ngele'mize lamine' igi mini O'moso'mo lehize-
ledavo minevo' alevo' oga' lemeni dameni nene
engikisi lelikisi makato' dalonive ne nizave li
ele'vole' i-ngidami asi gili nge li mini zou li
makato' lamini bizi minilo.

Monovo Lisihe' Lamineto' E'metilizadi'mo Mu-lumo Geni Gihilizani' Nene O'moso'mo Ninge Lamine' O-lengedeleseinaze. Lingine Monovo Laminekovo'Igi Mili Minilo Lo Petolo'Lo-ngimine' Gamazi

⁸ Naza gamazi lo osu' lo do vo no'novo molalosa ti' lo nolo-lingimuve: Lingine lutine gatine
nene hamoli'minevo' minivosa minilo. Ido' ge mulumo'ne ninge-nede ne mulumoka ninge-gede
lisavo' minilo. Ido' lengi' nene hamo' zuho
nizanaze. Ge luka neme ne lu'ne geme lisavo'
minilo. Ido' ezemu' mulunga hukivo hukivo

gezemu' muluno hukivo hukivo lisavo' minilo.
Ido' hokolize' ami okodine di'mi limivo' minilo.

⁹ Ido' lengi' di goloso nii-lingidavo ma a'mido'
golo hizi di goloso i-ngidamilo. Ido' a'mine'mine
igi lengi' nene gamazidunu' gizi'voti gamazi
ma nili-lingidavo ma nene a'mido' golo hizi
lingine gizi'voti li-ngidamilo. Asi O'moso'mo
lengi' vise lo do eita ine' nene eitati' nene
no'noho' dalizave losa ne'mine ine' nenako
nemu' nene ne'mine nii-lingidavo ma a'mido'
nene O'moso'mo no'noho' ize-lingidivo lisavo'
nene li-ngimilo.

¹⁰ Mene nolo-lingimuvoni' gamazi neve nene
mono' godolou' gamazi ti' li gizi nizani' malo'
nene vo nodave:
Ve ma aza minevo' alevo've lamine' minivo
laminekovo' mine do dizelesa gelelive nene
vele'mo gamazi gosoho' nasaha' lo gamazi goloso
lalive lo
velelo' nene gizebo lamine' ilive.

¹¹ Ido' monovo golosomu' nene olov'o' o mino
monovo laminekovo' ilive.
Ido' hongu lo lamino minaa' monovomu' nene
vise' ogo
imisele do vo dalive.

¹² Ee, Guvelesi ve'mi vele nene evene' lisi-
hetokovo' hulo mino
gizebo o-ngedo mino
ezemu' lilizani' gamazi nene gelelesa gapepe' o
minaa' neiha
evene' monovo goloso daa' avela nene gololo'
ninge-ngedo minaa' neine' nenako
nemu' nene a'mine minevo' alevo' lamineku'
minelesa gelelive nene

a'mine meuko luvoni' ne'mine nene ilido' o neive.

13 Ido' lingine monovo laminekovo' igi mili ilisa amuzo mili minilizani' nene evenelite ma di goloso i-lingidilizado' o neihe. Mo o'ove.

14 Ne neiha monovo lamine' igi mili ilizangu-mukisi mulumo gono ma gihi-lingidilizani' nene O'moso'mo ninge lamine' o-lengedeleseinako lamine' oloseive. Lingine evenelite lengehelele izeline' inite' i-lingidilizani' nene muludine badavo golise gilamilo.

15 Kilisito' nene lengi' lutine'mi Guvelesi ve minelive li ele'mizi milalo. Ido' lingine Kilisito'nimu' gili mu'musi' i nizangumu' evenelite longo' i-lingidika' i-lingidika' ilizado' nene a'mine gili mu'musi' i nizani' ne'mi monovo nene li ngolo' li li-ngimilizado' di va'va' ikisavo' minilo.

16 Ido' ne'mine igi li-ngimili ma nene humedame ami hongu gamazi laminekovo' li-ngimilo. Ido' lingine Kilisito' evenelelite ilizado' o neine' monovo lamine' igi mili minaa' naangumu' divi ledivi' igi laa' nave nene a'mine lengemenga langumu' nene ngovozo hililangumu' ve li monovo lisihe' lamine' gehepeve neive li lutingu' gili nizadokovo' nene e'meti minilo.

17 Ido' O'moso'mo gelavo lingine mulumo geni gihilizado' o noline' nene lingine monovo laminekovo' e'metilizadoti' a'mine mulumo geni gihilizani' nene lamine' oloseiha lingine mulumo geni gihilizani' nene mo monovo goloso dalizadoti' gihilizani' neve nene mo goloso oloseive.

*Kilisito' Aza Ve Lisihe' Mino Monovo Goloso
Ogo Molo Amine'za Leli' Lihimetemu' Mulumo
Geni Geho Helosa Gohi Oto Okulumokuko Dizo
Neive Lo Lo-ngimine' Gamazi*

¹⁸ Ee, Kilisito' azasi nene mulumo alumo gelo hiline' ve. Aza nene ve lisihe' minine'za O'mosola do bize-ledelesa evene' goloso leli' lihimetemu' lelito' medelo hiline' ve. Ido' a'mine gamene hamokovo' hiline' a'ne'mo nene leli' mukiliti lihimete nene mo osu' lilido' vo dani' ve. Aza neve nene evene' leli' okode ne'minesi neivosa nene bili hilani'za sikalahu've nene O'moso'mo do upuho' o-davo vele gizosa

¹⁹ a'mine sikalahu've nesi mino nene vo nala' numungu' minani' sikalahu' nene mono' lo-ngimine' ve.

²⁰ A'mine mono' lo-ngimine' sikalahu' nene gomu' Noa' minine' gameneu' Noa' aza sipi lolo' neivo O'moso'mo evene' engikumu' ize-bolo' molavo geto ngebelamo ha gizebo o minine' gameneu' eze gamazi gili hulave engi' nene mono' lo-ngimine' ve. A'mine sipiu' nene evene' ngomosi' eiti a'ne'minevo' dizikevo O'moso'mo nosodunu' do ngu' izine' ve.

²¹ Ido' a'mine noso velo ani' nene noso holaa'lmi avazaha ne'mine nene soto' ine' ve. Ee, noso hilaa' naadoti' nene O'moso'mo do lungu' izaa' neive. Ido' noso holaa' noune' nene okodelo' goloduvo gilite-ledelive losa nevoba asi O'moso'mo lute do guluvi' lo-ledavo guluvikovo' lo minaa' ilive losa ezela lo noso holaa' noune. Ido' a'mine O'moso'mo do lungu' izaa' neine' nene Izesu' Kilisito' hilinguti' otidi'mo ve losa do lungu' izaa' neive.

22 Ido' Kilisito' ei' neve nene idise Okulumokuko dizo O'mosoloti' lemo mino ana hulaa' idaa neivo angelo' nesi ido' ato ato' amuzo'inesi mini'mi monani' nesi nene gizeneuko limi gelekele' i-di nizavosa gizebo o'ngede neive.

4

Kilisito' Oko'nolo' Mulumo Geni Gihidi'mino Lazasi Gehelone Liisa Lihime Daa' Monovo Ato Ato' Nene Hulii O'moso'mi Lulolokovo' Igi Mili Nizavo Hililizani' Gamene Ilive Lo Petolo' Longime' Gamazi

1 Nemu' nene Kilisito' oko'nolo' mulumo geni gihidi'mine igi linginesi mulumo geni gihilizangumu' nene lutine gatine di amuzo mili di va'va' igisa minilo. Nene nanitekumu' ve. Ve ma oko'nolo' mulumo geni gehe nolive aza lihime daa' monovo nene mo hulosa noloseinako nemu' nene noluve.

2 Ido' ne'mine ma ilizani' nene idise meloti' nene haza okodesi minevo' alevo' o'mo dizelone' gameneu' nene haza alevete lanite' gila'a' naani' monovo nene laza gohi amo asi O'moso'mi lulolokovo' ogo molo minelone lisa ne'mine ilizani' o neive.

3 Ee, gomu' lingine O'moso'mi evenele minamave heta ato' velite ngumo helaa' ine' monovo goloso igi mili'mi dizani' nene mo moda ve lo noluze. Gohi amilo. A'mine goloso monovo nene adoi' ne'mine mana'mine monovo goloso longovozo hilami gopo iga', inite' goloso mamu' lutine otaa', nosolo' moni sipaki goloso iga', noso' nite' naba ni zohi' igi noso ni sipaki iga' ido' noso

naa' pati di soto' iga' ido' soza o'moso nge'metaa'
monovo goloso iga' ani' mamu' nene noluze. Mo
hulilo.

⁴ Lingine a'mine heta ato' vesi nene a'mine
monovo golosou' nene vili vivi' vivi' igi minani'
ma'mine nene gohi amavo ingine ningi upuho' igi
lengi' nene divi ledivi' igi lengemenga laa' nave.

⁵ Ne neiha a'mine engi' nene vetesi ha nonivesi
hilavesi monovotemu' goni' o-ledo ize' molo-
ledelesa do va'va' o neive ne'mo nene ne'mine
angumu' nene lingine nanitekumu' ave lo goni'
o-ngedo lihime ngemeleseive.

⁶ Nemu' nene mono' gamazi lamine' nene
hilavetidasi vo heteline' ve. Ingue haza
oko'inesi minani' gameneu' nene O'moso'mo
evene' muki' o-ledaa' neine' ne'mino engikisi
goni' o-ngedo lihime ngemavo hilani'za ingine
sikalahu'inesi mini O'moso'mo minevo' minevo'
oga' neidi'mine igi minivi' minivi' ilizangumu' ve
losa a'mine mono' gamazi lamine' nene engitasi
hulavo vo heteline' ve.

*O'moso'mo Nasahili' O-ledo Lehize-lede
Neine' Amuzo Nene Gele nGe Lo Mino Ogo Molo
Oloningumu' Petolo' Line' Gamazi*

⁷ Ido' inite' mata' muki' osu' lilin'e' gamene
nene mo avito' ogaze. Lingine nene O'mosola
lilizado' lisihe' i minilizangumu' nene lutine ga-
tine gopo amivo di vevesi minilo.

⁸ Lute ngemaa' monovolo' e'metilizave nete
nene evenelite di goloso i-ngidilizani' lihime
muki' nene di halekisavo' apasi-ngidilizani' ne-
nakonemu' nene lingine igi mili ilizani' inite'
mukikuti' ma dizo neine' nene lingine lutine ge

neme ne geme li minilisa nene amuzo mili igi mili minilo.

⁹ Ido' evene' numudingu' alizangumu' nene lingine nulu nulunga li lihitheheka lami numudingu' numudingu' nene ne do lamine' o-gede ge do lamine' o-nede lisavo' minilo.

¹⁰ O'moso'mo lengi' nene nasahili' o-lengedo gono daa' amuzo ato ato' vai' nene lehize-lengede neize. A'mine lehize-lingidine' amuzolo' nene gizebo lamine' igi minilizangisi lingine hamo hamo' a'mine di nizani' amuzodunu' nene ge hize ele' o-nede ne hize ele' o-gede li minilo.

¹¹ Ado' mono' lo-lengemelive neve nene O'mosolo' medelo mino ei' O'moso'mi gamazi'vevo' nene lo-lengemelive. Ido' nasahili' ogo hize ele' gono do-lengedelive neve nene O'moso'mo amuzo emaa' neine' votigilelo' nene do molo a'mine gono nene do-lengedelive. Ido' ne'mine ilizani' nene lingine Izesu' Kilisito' hize ele' o-lidivo laza olone' inite' mata' mukitoti' nene O'moso'mi gulive nene do naba o-delone lisa nene ne'mine ilizave. Ezela nene guvelesi ido' amuzo nesi nene mo minevo' minevo' ogovo' minelive. Mo ne'mino minilihoo.

Izesu Kilisitodo! Gi'mizi Nizavo Mulumo Geni Gihi-lingidilizangumu' Nene Upuho' Igi Olovo' Ami Longolize Izi Mini Monovo Lamine' I'mi Vi Mini O'mosolo' Lehete' I Minilizave Lo Petolo' Longimine' Gamazi

¹² Lu'ne lengeme nouvoni' alevekizo, lutine do ningalesa lengemengu' molo ololi'mo longolaa' neine' ne'mino mulumo geni gihi-lingidilisa naavo lengi' soto' o-lengedelesa neingumu' nene

lingine leli' soto' o-ledamilido' o neine' inite'
atoli'mine ma soto' o-ledelesa neihe li upuho'
amilo.

¹³ Asi Kilisito' mulumo geni gihine' ne'mine
nene linginesi gihi nilizani' nenako nemu' nene
lingine Kilisito' labana'vesi gohi soto' iline'
gameneu' nene luteu' gulumo avile lisivo mino
lolize naba izeloningumu' ve li longolize izi
minilo.

¹⁴ Ido' lingine Kilisito' evenele lili' igi eze
gulive di minangumu' lingilimaa' navo ma nene
guvelesi neine' O'moso'mi Sikalahu' neve nene
lengito' omo mino mine do viline' nenako nemu'
nene lingine longolize izi minilizado' o neive.

¹⁵ Ido' lengikuti' linge ma mulumo gono
gihi-lingidilizani' nene lingine evene' ma ngi-
bili hililizahe ido' gumine damine ilizahe ido'
monovo goloso atoli'mine ilizahe ido' evene' mal-
iti initeku' gavakavato' monaa' ilizahe ilizadoti'
mulumo gono lingimilizani' nene mo edamolo-
seize. A'ne'mine monovo nene mo amilo.

¹⁶ Ne neiha evene' ma aza Kilisiteni lolo' ogo
minelingumu' mulumo geni inite' gihi-dilizani'
nemu' nene ovozo helamo asi Kilisiteni gulive've
miningumu' nene O'moso do naba o-do minelive.

¹⁷ Ne'mine mana'mine monovolo' e'meti
minilizave lo meuko noluvoni' nene O'moso'mo
eze evenele zuho gonito' lele'mize molo-ledeline'
gamene mo alitingumu' nene noluve. Ido'
ei' evenele lelitoti' api' ogo evene' lihime
lengeme'mo viline' nene aizo, alinge' nela eze
gamazi've laminekumu' gili ele'vole' amave
goni' o-ngedo lihime ngemo do nadi' o-ngedelido'
o minelivoo. Mo mulumo gono goloso gehepeve

ngemeline¹ o noloseive.

¹⁸ A'mine neve nene mono¹ godolou¹ ti¹ li gizi
nizado¹ nene vo do neive:
O'moso¹mo evene¹ lisihe¹ lamine¹ do lu¹ izelesa
nene
ge¹'nebe ogosa do lu¹ izaa¹ neine¹ nenako
O'moso mehe¹ine imi lihimelo¹ monaa¹ ave nene
lukuvo nalizado¹ o neihe.
Mo keke¹ ngeli lukuvosi ma namilisave.

¹⁹ Nemu¹ nene O'moso¹mi lulolo¹ evene¹ ma mu-
lumo geni gihi nilizave engi¹ minevo¹ alevo¹ine
nene engi¹ do soto¹ o-ngidive ado¹ gamazi¹ve lavo
haza ma osa¹mive ei¹ anau¹ miliki eito¹ lehete¹ i
mini monovo lamineto¹ nene e¹meti minilizado¹
o neive.

5

*Petolo' Ga'ine Dani' Gamazi Gizingu' Mene
Mono' Gizebo Ve Ingue Evene'nido' Gizebo
Lamine' I-ngidilizani' Monovomu' Lo-ngimine'
Gamazi*

¹ Ido¹ lengikuti¹ mono¹ gizebo vetine mi-
navemu¹ nene gamazi lolouze. Gililo. Lengi¹
ne¹mine gizebo ve minuve ado¹ Kilisito¹ mulumo
geni gehe¹mo navo ningaa¹ ido¹ alinge¹ soto¹ o-
ledelesa neine¹ inite¹ lamine¹ labana¹vesi neine¹
nene makato¹ dalonivesi minuve naza gatine do
ti¹ lo nolo-lingimuve:

² Lengita O'moso¹mi zuho mulise nizani¹ neve
nene lu¹ine¹mi noso¹ nite¹ ngimika ngimika¹
igi gizebo lamine¹ i-ngidi minilo. Ne¹mine i-
ngidi minilizani¹ nene evenelite lutingu¹ hizavosa
nevoba asi lutine¹mo ne¹mine olosa gele noli-
dokovo¹ nene e¹meti ilo. Ido¹ ma nene moni

heneni inite' ma dalone li gili minisa gizebo i-ngidilizani' ne'mo nene lovozo helaa' inite' goloso ilisaze. Mo ne'mine ami asi O'moso'mo lingine a'mine gonomu' lutine mili minisa gono dalizave lo gele neido' nene e'meti gono dalo.

³ Ido' gohi ma nene ti' lo nolo-lingimuve: A'mine gizebo i-ngidi nilizani' aleve nene amuzo mala' mala' igi gizebo i-ngidami asi O'moso'mi zuho engi' igi mili minilizani' inite' nene lingine avazaha pikisa ne'mine mini aka ngelebizi igi mili minilo.

⁴ Ne'mine ikevo gizebo ve naba aza soto' ogo heteleline' gameneu' nene lingine meni dalisave. Ado' geleso osu' lamiline' palaisi labana'vesi neine' nene dalisave.

*Goso've Nene Gizebo Ve Gili nGimi Nizavo
Evene' Muki' Oko'ine Di'mi Limisavo' Mini Kil-
isito'nimu' Gili Ele'vole' Ani' Nene Di Gili' Li Mini
Satani Lovo I Imi Minilizangumu' Lo-ngimine'
Gamazi*

⁵ Ido' mono' gizebo ve gono'ine neivo ha iga' naani' ne'mine igi goso'elite ilizani' o neine' inite' nesi nene mo ne'mino neive: Lingine nene gizebo veticelite lilizani' gamazilo' nene ha gili ngimisa minilo. Ido' mono' godolou' O'moso'mi monovo ma ti' li gizi nizani' ma neive:

Evene' ma oko'ine di dizi minaa' nave nene
O'moso'mo biluva' o-ngedaa' neiha
evene' ma engi' oko'ine di'mi limi minaa' nave
engi' nene
ninge lamine' o-ngedo nasahili' o-ngedaa' neive.

Aza ne'mine oga' neine' nenako nemu' nene evene' muki' lingine okodine di'mi limi mini ge gelekele' o-nede ne gelekele' o-gede li minilo.

⁶ Ido' O'moso neve nene ne'mine oga' neine' nenako nemu' nene lingine ei' molani' gamene soto' ilingu' nene do ote-ledelingumu' ve li lengi' okodine nene di'mi limisa O'moso'mi anau' vi mini ei' amuzo've nabalokovo' nene lehete i minisa

⁷ O'moso'mo lengikumu' mulumotine gele minaa' neine' nenako nemu' nene lingine gopo gatine gila'a' nani' initetine geni ne'mine vai' nene ei' anau' huli milalo.

⁸ Lingine nene lutine gatine vo gopo'napa amivo gatine gili nge li mini ehe' igi ningisa minilo. Ado' biluvatine Satani aza loposo gulo naba laioni ne'mo ga'na helo ngebelo naline' initekumu' viseto' monaa' neine' ne'mino lengbeleesa nomonize. Ningisa minilo.

⁹ Mulumo geni lengi' nigihi-lingidani' ne'mino nene lengi' zuho Kilisito' evenele misubo vaiku' mini'mi monave engikisi nene a'mine'mine igi nigihi-ngidani' nenako lingine nemu' gili mini Kilisito'nimu' gele ele'vole' iga' nani' nene di gili' li minisa a'mine biluvatine nene lovo i imivo' minilo.

¹⁰ Ne'mine igi a'mine mulumo geni nene gihu'mi vi nizavosa gamene ha'na amivo a'mine ato ato' initoku' mulumote ningo nasahili' o-leddaa' ive O'moso ado' Kilisitoda vi gi'mizisa labana'vesi minevo' minevo' oga' neine' mo'mosiku' nene imi hilalizave lo lengi' vise lo do eita ive ne'mo nene gohi do lamine' o-lengedo do ngi lo-lengedo ido' amuzo lengemo

ele'vole' igi oti pehe li minilizado' lengele'mize molaloseive.

¹¹ Amuzo muki' nene gamene gamene eitavo' minivo. Mo ne'mino minilihoo.

Petolo' Luhuovo Nite' Gize Osu' Nolo nGopo'ni Lo Gizine' Gamazi

¹² Naza gamazi noluvo ezelo' gele medele minelodo' o neive lo giluve ado' leze zuho Siluvano' ne'mo hize ele' o-nedo luhuyo mene nogizivo naza a'mine gamazi noluvoni' meve nene O'moso'mo nasahili' o-ledaa' neine' monovo gihile'mi gamazi ve lo lo-lengemelesa naza hize ele' ogosa lengi' lutine nene do ngi lo-lengedo luhuovo nite' li'nibe mene nogize-lingiduze. A'mine O'moso'mi nasahiliku' nene mini gili' li minilo.

¹³ Ido' lengi' ne'mine aleve O'moso'mo maka' do kegese-lingidive Kilisito' evenele Babelonia numuno ebeku' mela mulise milaa' nave ingine longopo'ni nilavoo neze gipe'ne Maleko' azasi nene longopo'ni nolize.

¹⁴ Lingine nene isetine ve li lute ngemaa' monovo di soto' igi ge nabuti' ize ne gabuti' ize li adido' disa minaa' ilo.

Hongu lo lamino minaa' monovo neve nene Kilisito' evenele minave lengi' mukita minivo.

Moda a'nesi' ve.

**MONO' GODOLO GOSOHO'
The New Testament in the Dano (Upper Asaro)
language of Papua New Guinea
Nupela Testamen long tokples Dano (Upper Asaro)
long Niugini**

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

PDF generated using Haiola and XeLaTeX on 18 Apr 2025 from source files dated 31 Aug 2023

76c78bc1-63e6-5f61-a363-169051cf72e